

食 漢書曰萬石君時賜食於家必稽首俯伏而食如在上前子孫有過對案不食 東觀漢記曰汝郁年五歲母疾不能飲食郁亦不肯食母矜之強為之食飯欺之愈郁視母色未平輒不食 又曰梁鴻少孤以童幼詣太學受業治禮詩春秋常獨坐止不與人同食 王隱晉書曰何曾食日近萬錢猶曰無下著處也 又曰皇甫謐姑子梁抑為城陽太守或勸謐送謐曰抑為布衣過吾送迎不出門食不過鹽菜貧不以酒肉為禮也今作郡而送豈古人之道哉 梁劉孝威謝東官賜聖僧餘饌啓曰齊相柏寢之器周穆軒宮之寶乳糜香飯素糝粳漿五杏七桃靈瓜仙棗莫不氣馥上天薰流下界石崇芳果金谷僅於萬株陳湯木滋杜陵幾于千樹猶自高謝珍奇多慙品族 又謝東官賜淨饌啓曰糜獻牛牧飯出龍宮千品甘露之食百花珍藥之果餅兼髓乳漿苞蔗捺雕盤流其滋百寶器委其包香足使五世長者羞彼識味一角仙人耻其呪術微物多幸叨奉曲恩性命可捐殊私難答 陳徐陵謝勅賜祀三皇五帝餘饌啓曰竊以甘泉之殿舊禮義軒長樂之宮本圖堯舜自東京晚世曠代無聞西漢感

儀復親今日金壺流十旬之氣玉案備千品之羞且絳羅為薦既延王母紫蓋為壇允招太一同斯美號理致眾星臣以餘年豫開清祀如陪瑤席遂飲瓊漿 梁吳筠移曰月光離華風氣入箕細雨如網細柳如絲離隔東西之怨眺望山川之阻企龍門而不見覽桂枝而延佇此乃方寸之恒情羗難得而覩縷也亦有鮑叔分財華歆讓位乃相知於平生實忘懷於寤寐雞有呼羣之德鹿有食草之美在微物其尚然况仁義之君子哉今足下居則廣夏高堂連闈洞房綺牕半卷屏風角張指天地如一指安知故人之可傷一死一生乃知交情一貴一賤交情乃見謂古昔之恒談在今日而方見嗚呼如何忘我實多輒欲彈琴縱酒於首陽之阿君有廚中腐肉而僕不厭糟糠君有鴈鷺之食而余不得一嘗願以小人之腹為君子之腸何如哉今欲君之餘江臯綠蔬之筍洞庭紫鬣之魚崑山龍胎之脯玄圃鳳足之藟千里葦羹萬丈名贈氣馨若闌色美如艾扶南甘蔗文三節白日炙便銷清風吹即折安定之梨皮薄味厚一歲三花一枚二升凡厥上味惟君能施君若不施成君深累於神為不祥於人為德義